

KUMPUNAN
KHAUWTLANG NUN
SIAMTHAT

YMA AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.23 12th June 2011

Central YMA Hall-ah CEC Meeting

Chanmari West, June 12:

Ni 7th June, 2011 zan dar 7:00 khan Central YMA Hall-ah CEC Meeting neih a ni a, Pu Lal Chungnunga President-in kaihruiin member 42 an tel a ni. Pu Lalbiakzuala, Gen. Secretary hnen atangin reports ngaihtlak a ni bawk.

Thurel tlangpuite :-

1. YMA General Conference thurel Hnamdang dan lova sumdawng chungchang lo zirchiang tura Study Group te thil hmuhdan tlangpui report ngaihtlak a ni a, Study Group te rawtna hrang hrang pawm a ni. Chung rawtna te chu :- a) Non Tribal Mizo hming hawha sumdawngte enfiah a, dan anga sorkar-in an chungga action a lak theih nan Trade & Commerce leh Taxation Deptt-ah an permit neihte uluk zawka enawn tura ngen nise. b) All DC (ILP Cell) ah an permit pek chhuahte an purpose of stay ang lova hnathawk te dapchhuak tura ngen nise. c) Aizawl khawpui chungga Mizo hming hawha sumdawng nia hriatte an awmna veng Branch YMA OB te phungbawmah sawmin dapchhuah nise, ti tawh lo tura ngen leh hriattir nise. Hei hian kawng sira Apple etc. zuarte pawh huam tel se, Mizo Iron Rod Dealer Association te pawh sawm nise.

2. YMA General Conference thurel RBI phalna nei lova a pung tam tak tiama sum la thin zirchiangtu Study Group ten an hmuhchhuah Chief Minister hnena thlen bak a dang 10

hmuhchhuah belh a nih thu ngaihtlak a ni a, hengte hi sorkar-ah thlen leh nise tin a tul angin media ah pawh tlangzarhin inzirtirna uar zawka neih nise tiha ni.


3. Ruihlhlongaite puala Gospel Camping 27.6.2011-10.7.2011 inkara neih tur chungchang sawiho a ni a, he Campingah hian Pu Lalsanglura Ralte, Sons of God Ministry Speaker chu sawm nise tih a ni.


4. Lengpui Branch YMA atanga Model Branch YMA Lengpui indan an dilna chu pawm a ni a, he Branch thar lo piang tur hi 25th November, 2011-ah an indang ang. Tin, Vengnuam Branch YMA, New Serchhip chu Venglai Branch YMA, New Serchhip tia an thlak chu pawmpui a ni.


5. FOMTU ten hlawhfa rate an siama, Mizo Head Mistiri hlawh ` 500/- an tih chu kan ram Economic ngaihtuahin a sang lutuk ahriat a ni a, ` 400/- a tih niam tura ngen nise. Tin, Mizoram sawrkar-in Minimum Wages rate thar a siam tak avangin Labour/Helper hlawh ` 170/- a kalpui nise. Meeting hi tuang takin zan dar 10:15 ah zawh a ni.


(Source CYMA Website)

Branch News

 Karleh Ni 15.6.2011 (Nilai) khi YMA Day a ni a, hemi ni hian Indoor Studium-ah Infiamna chi hrang hrang hmangin hun hman tur a ni a, memberte a tam thei ang ber kal tura ngen kan ni e.

 Ni 13.6.2011 (Thawhtan) zingkar hian Section tinte mahni Section chungah YMA Day puala faina hnattlang neih tur a ni e.

 Thlan In a thlanlaihna hmanrua hmandan hriattirna tar tur Pu Zonunsanga (Zotea) 'T' Sect. leh Pu Lalnunthara Sailo in YMA Park-a Sava humhalh tura ngenna thuziak a thlawna min siamsak chu an chungah Branch YMA chuan lawmthu a sawi takzet.

 Nimin Inrinni zingkar khan Thlanmual Samfai hnattlang neih a ni.

PEMLUT

Lalramsangi te chungung Sakawrtuichhun atanga rawn pem, Pi Hmuni te In 'V' Section ah an rawn pem a, mi tha tak an nih chhoh kan beisei.

HRIATTIRNA

Thlanmual a thlanlaihna bungrua te hi chhiat tawh a, thlan siamna atan chauh a hman phal a ni a. Thlan siamthat leh lungphunna atana thlan siam nan chuan hman phal a ni lo.

LUSUN KHAUWHAR

Pi Darkhami Kum 96, Pu F.Zosanga nu 'K' Section chu Ni 9.6.2011 tlai Dar 4:00 khan a boral a, a kalsan tak a tu leh fate CWBYMA chuan a tuarpui takzet a ni.



TUN KAR CHANGVAWN

Engkim ka tih apiangah ka tihhmuh thin che u kha, chutianga thawk rim chung leh, Lalpa Isua thu hre reng chungin mi chak lote in tanpui tur a ni; amah ngeiin, 'Englo lak aiin pekin lukhawng a nei zawk,' a tih kha," a ti a. *Tirkohte 20:35*



YMA Park-ah Zo Tukloh in bu an chhep.

(Pathian in duh taka a siam nungcha te hi Vengchung mipui ten kan humhalh a, ngaihngam taka kan awm tir a pawimawh takzet a ni.)



YMA Day Pualin Thlanmual sam fai hnattlang neih a ni. (11.6.2011)

Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkuma
9862303135

Pu Vanlalhluta
9862366308

Tv. Vanlalfawna
9856301975

Cir.Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khiangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlina kha hlen rawh. II Tim 4:5

Editorial : Mizorama pawl lian ber a chhal ngam YMA chuan a ni 'YMA DAY' chu a thleng leh dawn ta reng mai. He hun lo thleng tur hi keini Branch pawhin kawng hrang hranga hman tum in hma a la chho zel a, he hun pawimawh tak hi YMA member zawng zawng ten ngaipawimawh theuh ila, kawng hrang rang a tih tur Branch in a chhawpchuah te phur tak leh tha tho taka hlenchhuak theuh turin member tin ten rilru pu theuh ila a tha awm e. YMA member kan nih ang taka midangte tanpui thei a kan awm hi nihlawthlak tak a ni tih kan hriat thar a pawimawh hle a ni. Tanpui ngaite tanpui a, kan hunawl te tangkai taka hman theuh tum tlang ila, midangte tih a dah mai lo leh YMA member kan nih ang taka he hun lo thleng tur atan a kan hun leh tha kan pek a pawimawh takzet a ni.

Article :

YMA DAY THUCHAH

- Lal Chungnunga
President, CYMA

June ni 15,2011 YMA dincham wawi 76-na kan lo thleng leh dawn ta, min hruai zeltu Pathian hnenah lawmthu sawiin, kan dinchamah hian YMA member zawng zawng te duhsakna chibai ka buk e.

Thuvawn ropui "YMA chu tanpui ngaite tanpuitu a ni" tih hi he hunah hian lantir zual ila, kan tanpuina mamawhtu apiangte hnenah a theih ang angin tanpuina hna i thawk ang u. Kan khawtlang nuna siamthat ngaite siamthat hna Zoram dung leh vangah YMA in a thawka, kan thawhrimna chuan tunah leh nakinah rah tha a chhuah ngei ang. Kum tharah eng nge kumpuan thupuih kan hman dawn kan hrelo, hun tlemte kan neih chung hian kan khawtlang nun a chhe lai siamthat hna thahnemngai takin i thawk zel ang u khai.

Hna tul a pung :

YMA in kumpuan thupui kan neih changin ti-hlawhtling turin theihtawp kan chhuah thin. Kuminah hian nidanga kan buaipui ngailoh, buaipui a ngaiin Committee sangin a hria a, kan ram leh hnam tana thil tul a nih avangin theih ang angina kan buaipui ta a ni.

Kan kumpuan thupui 'Khawtlang nun siamthat' chu a hnuai tarlan ang hian kan pawt fan a, hma kan la mek a ni.

1.Vai mistiri leh helper rate kan bithliah ta mauh mai : Aizawl khawpui mi hrang hrang atangin, Vai mistiri leh helper rate an duh hun huna an tihsan thin avanga sawiselna Central YMA-in a dawng tam hle mai. Vai ruai thinte hnen atanga nawrna a nasat avangin kan ram leh hnam tan tiin Central Co-ordination Committee(CCC)meeting 13.4.2011-a thukhawm chuan rate a bithliah ta tawp mai a ni. Vai emaw, vai lo emaw pawh nise, an rate bithliah hi YMA-in a ti ngai lo. Mipui nawrna avangte, rate mumal an neih loh avangte leh sorkar nawr nan YMA chuan rate a siam ta a ni. A bak zel chu sorkar-in a bawhzui tura ngaih a ni. Vai mistiri rate sang ber in ni 1-ah Rs.300/-aia sang a la tur a ni lo bawk. Hei hi vai ruai thin zawng zawngin zawm vek nise tih hi YMA rel dan a ni. YMA duhdan hi min ngaih pawimawh sak hram turin YMA chuan mipuite a ngen a ni.

2.Bank lema sumdawng : General Conference thurel bawhzuiin Central YMA chuan, kan rama bank hmanga sumdawngte uluk leh fimkhur takin a chhui Chiang a, tunah hian hetiang bank lem hmanga kan rama rawn sumdawng, tunah khawiah nge an awm tak tih chhui hleih theih loh 22 vel an awm tih hmuhchhuah a ni. RBI phalna neia rawn sumdawngte pawh phalna an neih angin an thawk em tih pawh chhui zel a ni.

Thil pawl tak pakhat chu, a dik leh dikloh ngaihtuah hmasa miahlova, reilote chungna hausak thut Mizoten kan duhna hi a ni.

Chiahpuam in a ben harh zawh loh kan ni a, a hman hmanin min bum ta mai hi a lungchhiatthlak ta khawp mai.Fimkhur a ngai tak zet a ni.

3.Tuikuk lakluh chungchang : Central sorkar in Tuikuk, State pawna raltlan te chu March 31,2011 ral hma ngeia Mizoram a lut leh vek turin a ti a, hei hi an zawm lo hle a, zawm turin Central sorkar pawhin a tihur a ti biklo-chu chu anmahni chhawmdawlina tur pek a tum chu a hunah a pe theilo a ni. Hetih lai hian Sakhan tlangdunga Mizo awm, chhungkaw 80 vel , nasa taka Tuikukte avanga harsatna taw, Central-in chhawmdawlina pe ve tura Mizoram political party zawng zawng leh NGO zawng zawng te ngenna chu tun thleng hian tih puitlin a la ni lo.

Tuikukho, anmahni duh thu ngei a, dawt phuahchawpa kan ram tlanhchhuahsan lui, Mizote min hektu te mahin chhawmdawlina an dawng a nih chuan, an kut tuara mangang Mizote pawhin an dawng ve ngei tur a ni tih hi YMA ngaihdan a ni tawp mai. Ni 16.5.2011-a political party-te aiawh leh NGO aiawhte chuan, 'Sakhan tlangdunga Mizo, Tuikukte avanga harsatna tawkten chhawmdawlina an dawn hma chuan Tuikuk lakluh hi tawp lai lawk nise' tiin Central sorkar-ah rawtna a thlen ta hial a ni. Union Home Minister hian Tuikukho lakah beng dawhin wavi khat lo kal tawh in, a wavi hnih nan ni 18.5.2011 khan Tuikukho baww rawn hmuh a tum a, khawchhiat avangin a lo kal thei ta lo. Mizote lakah beng a dawh duh si lo hi hriatthiam a har hle a ni.

Sakhan tlangdunga Mizo te an phu anga chhawmdawlina pek an nih hnu-ah Tuikuk lak let chungchang hi date line sim tawh nise tih hi YMA duhdan a ni.

4. Kan in thlang leh dawn : Tum anga kan awm chuan October ni 27, 2011 ah CYMA hruaitu tur kan thlang leh dawn. Thlan tura chhawp chhuahte zingah tumah mahni insawi mawiin midang dem lo se, mimal taka insawichhiat leh inbeih hi MLA/MP inthlanah pawh kan tih duh tawh loh a ni a, YMA-ah phei chuan tih loh hram hram a tha. Member ten a hun takah an hruaitu tur an thlang mai dawn a ni tih hria in, an chhia leh tha hriatna pawt peng thei zawng thil tih loh a tha. "YMA chu politics rawng kai lo, pawl thianghlim a ni" tih hrerengin, YMA Thianghlimna i vawng nung zel ang u. YMA -vul zel mawlh rawh se.

Ka lawm e.

(YMA chanchinbu June, 2011 atanga lak)

TAITESENA

✎ Tunkar Nilaini YMA Day (15.6.2011) hman na tur ah YMA member leh hruaitu zawng zawng te kim taka kal theuh turin an in ngen.

✎ YMA Day lo awm tur atana Section aiawh a intihhlomma hrang hrang items a tel turin heng mite hi ruat an ni a, tlawmngaia hlenchhuak theuh turin an in ngen.

1. *Carrom Board (M) 2pair :*

a) Pu Lalngaihawma leh Pu Vanlalbera.

b) Pu Vanlalsanga (Asanga) leh Tv. Joseph Lalduhsaka.

2. *Draught Board (M) :* Pu L. Ringzuala leh Pu R. Lalbiakhluna.

3. *Chinese Checker (W) :* Ni. Tlangmawii leh Ni. Lalthlamuanpuii.

4. *Musical Chair (W) :*

Ni. Lalthanpuii Ni. Lalremtluangi, Ni. P. C. L. al t h a n m a w i i Ni. TC. lalsawmzuali & Ni. Lalhriatpuii.

5. *Kawikah (W) :* Ni. Lalzarzovi, Ni. Esther Lalremtluangi, Ni. R. Lalhmangaihzuai, Ni. Lalruatkimi leh Ni. Lalthlamuanpuii.

6. *Ball Kick (M) :* Tv. Vanlalhriata, Tv. Lalrinzuala, Tv. P. C. Lalrempuia, Tv. Lalthlanhlua & Tv. Malsawmtluanga (Mala)

7. *Tug of War (M&W) :* A lo buaipui turin Pu R. Lalsangzuala leh Tv. Johnny Lalthanpuia te ruat an ni a, an hnenah hian inbuk theih a ni e. (Mipa 500kgs aia tam lo tur leh hmeichhia 450kgs aia tam lo tur a ni.)

Heng bakah hian Ring theh (Mixed) leh Balloon Passing (Mixed) a tel tur te chu a kalkhawm atanga in ruat tur a ni.

✎ Bial 10-na a Mitthi Buhfai khawntu atan Lallianmawii chu ruat thar a ni.

✎ Ni 5.6.2011 (Pathianni) khan Mitthi Buhfai khawntute kohkhawm an ni a, nasa leh zuala tan la a mawhpurhna hlenchhuak thin theuh tura fuihna neih a ni. Kalkhawm te chungah committee chuan lawmthu a sawi takzet.

✎ An hruaitu Pu P. Lalramliana nupui Pi Mahruaii New Life Hospt. a damlo a awm pawh damtakin a lo chhuak leh tawh a, a that chhoh zel an duhsak.

✎ Naktuk ni 13.6.2011 (Thawhtan) zingkar hian YMA Day denchhen in Section huamchungah faina hnatlang neih tur a ni a, CVTTP Library kawtah inngahkhawm tur a ni. Member zawng zawngte kim taka hnatlang theuh turin an in ngen.

VANAPA

✎ Dt. 7th June 2011 (thawhle) Zan Khan Pu Roluahpuia In ah Section Committee neih ani a, member 22 an kal.

✎ Section bungrua felfai zawk a enkawl anih theih nan Property incharge in ruat thar a ni a, Pu Zosangliana, Pu Francis Lalrindika (Sena), Tv R. Lalringgheta (Covenar) leh Bungrua in Chahbi kawltu a tan Tv Zohmingliana ruat an ni. Section kaltlangin an ni hnenah hian bungrua hawh thin tur a ni.

✎ Zirtawp zan khan Pu H. Lalrinthanga in ah YMA Day a hla rem tur zir a ni a, Thawhle Zanah zir leh tur ani a, atel tur zawng zawngte kal vek tur a ni.

✎ YMA Day programme hrang hrang, hnatlang, function leh intihsiaknaah te section hruaitu leh membete theih tawp chhuah theuh turin an in ngen. Sanitation a mawhpurna Section in kan changa theih tawp chhuah turin an in ngen.

✎ Dt 4.5.11 (Inrinni) khan Section Zaipawl Music Video shooting neih a ni a, hmanrua mamawh hrang hrang thawhtu te bakah Zofa Cultural Club ten an thawmhnaw an hawh tir chu an lawm hle.

✎ Ni. C. Lalbiakzuali D/o C. Lalsangzuala IMEM solo competition a Top Ten a tling leh Tv TC. Vanlalthanpuia S/o TC. Lalremsiama India ram aiawha Karate khel tura thlan te Section hminga lawmpuina thil pek an ni.

✎ YMA Day a Carrom board a Section aiawh tur zawna vawin chawhnu inkhawm banah Pu Roluahpuia In ah neihtur a ni a, a duh apiang tel theih a ni.

✎ Section chungah mi Motor/ Bike a Petrol ruk ching an awma man chhuah palh an nih chuan an chungah engpawh thleng se

CHAWNGBAWLA

✎ Zirtawp zan khan Section Committee neih a ni a, YMA Day chungchang leh pawimawh dang sawiho a ni.

✎ Vengchungah chhiat tawk an awm avangin Thalai inkohkhawm chu thul leh a ni a, Ni 17.6.2011, zirtawp zan ah a hun hi sawn a ni a, sawmna rawn sem thuai a ni ang.

✎ YMA Day lawmnaah membete kal theuh turin an chah a, intihsiakna a tel tur pawh tih fel tawh

(CH-Section Report chbunzawmna)

a niin, lehkha pek thuai an ni ang. YMA Day den chhen a Mass Road Racing a tel turin member zawng zawngte an sawm.

✎ YMA Parkah Tukloh (Sava) in Bu a khuar a, Section chuan a humhalh tlat a ni tih vengchung mipuite lo hriatsak turin an ngen.

✎ Pu Lalhmachhuana chuan Property Register tha tak a thlawna a siamsak avangin a chungah lawmthu an sawi.

✎ Pu K. Lawmthanga chu New Life Hospital ah a awmmek a, a thatchhuah leh thuai Section chuan a duhsak hle.

NEUVA

✎ Ni 9.6.2011 zan khan section Committee pawimawh tak neih a ni.

✎ Thawtan Zing hian YMA Day den chhenin faina hnatlang neih a ni ang.

✎ YMA Day zing dar 6:00 am ah kawipui atanga Mass Road Racing neih tur leh YMA Day (Nilai) dar 10:00 am atanga Indoor Stadium-a section wise in tihsiakna neih turah Member atam thei ang ber tel tum turin an in ngen.

✎ Section project a hlawhtlin theih na tura hruaitu Talent ip an sem chu tun thla chungin Secretary hnenah theh luh tur a ni.

✎ An Leader chhungkaw pawimawh a Silchara zin chu dam taka alo haw leh thuai an beisei.

✎ An member Lalnunhlui chuan Vanapa Section lamah khiangminawisan ta chu an ui rualin anlawmpui hle.

KHUANGCHERA

✎ Ni 15.6.2011 Nilai ni YMA DAY hman na tur ah memnber a tam thei ang ber kal tur in an in ngen a, mawhpurh na leh chanvo nei tur a ruat te phe chu kal ngei tur in an inhriattir

✎ Pi Darkhami Kum 96 Pu F. Zosanga nu in ni 8.6.2011 a boralsan chu paw in ti an ui takzet a, a kalsan tak atu leh fate an tuar pui tak zet.

✎ Ni 15.6.2011 YMA Day zing dar 6:00am a Mass Road Racing neih turah Member atam thei angber tlan turin an in ngen.

✎ Naktuk (Thawhtan) zing ah Section faina hnatlang YMA Day denchhena kohtum ani a, Section Membete lo in buatsaih turin an in chah.

✎ Hunremchang hmasa ah khua a that chuan Section sumtuak a inhlawhna leilaih hnatlang neihtum a ni a meberte leh hruaitute hun lo in siam turin an in ngen.

YMA DAY PROGRAMME HETIANG HIAN DUAN A NI

YMA Day Programme Committee'te chuan kumin 2011 YMA Day Ni 15.6.2011(Nilaini) a lo thleng tur atan hetiang hian memberte intihhlumna tur leh programme hman dan tur a duang.

1. MASS ROAD RACING (M&W) :- Ni 15.6.2011(Nilaini) zing dar 6:00 ah kawngkawipui (CH Sect.) atanga Vaivakawn lamah tlan thla in, Company peng atanga Sairang road ah tlan phei zelin, Edenthar-a Lalsangliana Petrol Pump atanga Chanmari 'W' lamahrawn chho lehin, tlan tanna ah tawp tur a ni.

He Racing neih tur a Point hrang hrang-a duty turte :-

- 1) Hunthar kawngkual : Section tin Asst.Leader zawng zawng.
- 2) Company Peng : Section tin Treasurer zawng zawng.
- 3) Lalsangliana Petrol Pump : Section tin Leader zawng zawng.
- 4) Kawngkawipui : Pu T.Ngurkhuma, Pu R.Lalhmachhuana leh Pu Lalthuamluaia
- 5) Guide : Pu C.Lalzarliana, Pu K.Darthantluanga leh Dr.Lalramliana.

Hriat turte :-

- a) Mass Road Racing Flag off : Pu Vanlalsawma, Adviser.
- b) Tlan thleng hmasa te tan 1-na atanga 3-na thleng lawmman siam a ni ang.
- c) Tlanna tur nilo a tlan, shortcut a tlan leh motor-a bet/chuang tlang hmasa an awm a nih chuan pawm a ni lo ang.
- d) Duty na point tin ah tlan zawng zawng ten thil lak tur a ni a, la kim lova tlan thlen awi a ni lo.

2. YMA DAY Function :-

A hun	: Ni 15.6.2011(Nilaini) Dar 10:00 AM.
A hmun	: Indoor Stadium.
Chairman	: Pu R.Lalhmachhuana, Chairman YMA Day Programme Committee.
Hunserh	: Chairman.
Kumpuan Thupui Sawi (10min)	: Pu T.Ngurkhuma, Chairman Kumpuan Sub-Committee.
Chawimawina hlan	: Pu R.L.Thanhnuna, Secretary.
Opening Song	: Vanapa Section.

INTIHSIAKNA ITEMS & KAIHHRUAINA**1. KAWIKAH(Women):**

- 1) Section tin atangin mi 5 theuh.Mi 1 in vawi 3 zel a kap ang.
- 2) Section tin ten kawi 5 theuh in tum tur a ni.
- 3) Kawi hi a bi ah 5 chawn a ni ang.

2. CARROM BOARD(Men) :

Section tin atangin pair 2 theuh.

3. DRAUGHT BOARD(Men) :

- 1) Section tin atangin 2 theuh. Best of 3 a khelh tur a ni.

4. CHINESE CHECKER(Women)

: Section tin atangin mi 2 theuh.

5. MUSICAL CHAIR(Women) :

Section tin atangin mi 5 theuh.

6. RING THEH(Mixed) :

- 1) Section tin atangin mi 20 theuh.Mi 1 in vawi 3 a theh ang.

7. DART THROW(Open)

8.BALLOON PASSING (Mixed) :
Section tin atangin mipa leh hmeichhia 10 ve ve tur a ni ang a, point a awm lo ang. Intihhlumna tur a ni.

9. BALL KICK (Men) : Section tin atangin mi 5 theuh in pet tur a ni ang.

10. CHANA CHHAR (Open)

11. TUG OF WAR (Men & Women)
: Section tin atangin Mipa 500kgs leh hmeichhia 450kgs aia tam lo tur a ni ang.

12. SECTION SECRETARY

INZAIKIAK : 1) Duh duh hla sak tur a ni ang. 2) Guiter/Khuang hman tur a ni ang a, in perh sak leh vuak sak awih a ni lo ang.

HRIAT TUR DANG :

1. Intihsiakna item hrang hrangah (Open tel lovin) mimal tan lawmman

1-na atanga 3-na thleng a ni ang.

2. A pumpui lawmman tur hetiang hian ruahman a ni.

1st : Silpouline & Certificate

2nd : Dekchi

3rd : Steel No

4th : Enamel No

5th : Enamel No.

3. Section tin ten YMA Flag leh mahni Section Colour flag ken/tar theuh tur.

4. Incharge hrang hrang :

1) Sound System : T-Section.

2) Seat arrangement : K-Section

3) Sanitation : V&N-Section

4) Sound System (Mass Road Racing) : CH -Section.

5) Banner : Pu K.Darthantluanga
Asst.Secretary

5. Intihsiakna te hi Medal tally ang a kalpui a ni ang.

6. Refreshment tuihnai tak siam a ni ang.

7. Attendance hi vawi 2 lak a ni ang.

CWSC NEWS**Football Sub-Committee :**

👉 Dt. 8.6.2011 zan khan C.W.S.C Football Sub-Committee hmasaber neih a ni a, thu pawimawh tak tak rel a ni.

👉 Players Registration chu tih mek a ni.

👉 Information incharge atan Tv. Jacob Lalrinsanga leh Tv Ramnunmawia te an ruat.

👉 ADVA in Season Opening Tournament Indoor Stadium a Ni 27.6 - 2.7.2011 chung a neih turah thingpui dawr siam tum a ni a, hruaitute hunawl lo insiam turin an in ngen

👉 An Committee Member Pu Lalbiakhlua chu ADFA Asst. Secretary a thlantlin anih chu an lawmpui hle.

Volley Ball Sub-Committee :

👉 ADVA Affiliation hawn mek a ni a. Chanmari West Sporting Club tana Vplleyball khel duh zawng zawngte chu Dt. 12.6.2011 (Sunday) tlai Dar 3:00 ah Pu C.Lalthanzuala In ah kal khawm tur a ni.

LOCAL COUNCIL NEWS

👉 *Vengchhung Electric chungchang* : Local Council Sitting hnuhnung ber ina a rel tawh angin vengchhung current chhia leh thim chungchangah hma la in siamthat mek zel a ni a, Electric Deptt. nen tang dunin theitawp a hmalak a nih laiin khua a chhiat avangin chawlh lailawk hrih a ni a, khua a that veleh siam chhunzawm leh tum a ni.

MHIP NEWS

👉 Chanmari West Branch MHIP Executive Committee thuchhuak chuan MHIP Building sak kallai zelah Rawra chhut hnatlang a ko dawna, June 15 Dar 10:00 a.m. ah MHIP Building-ah member zawng zawngte kim taka kal a hnatlang tura ngen leh hriattir kan ni e.

Lehkha Kawngbo

ZD Zohmingthanga, Chanmari West, IGNOU atangin a lo thleng a, Editor hnenah lam theih a ni e.

ADMISSION OPEN

FRED-BEE HOSTEL & TUITION CENTRE

Zotlang, Aizawl.

* Mattress provided

* Separate Locker

NIGHT HOSTEL ALSO AVAILABLE

Contact :

9436152297/9862325133